

CAPUT II.

BENEFICIUM A NANDINI DATUM.

1. AT prima luce civium moderator, gloria abundans, sapientis vaccam, a regina odoribus sertisque ornatam, vitulo ejus lactato atque religato, dimisit in sylvam.

2. Regis uxor legitima, prima numeranda inter mulieres castas, vaccæ viam, cujus pulvis ungularum vestigiis sacratus erat, sequebatur, sicut legum codex sequitur *Vedarum* sententiam.

3. Rex misericors, gloria decorus, postquam reverti jusserat uxorem amatam, custodivit SURABHIS filiam, ac si fuisset terra sub vaccæ specie, quattuor oceanis in ubera transformatis.

4. Deinde ille, qui voti solvendi caussa vaccæ vestigia sequebatur, reliquos etiam comites dimisit; neque quisquam alius corporis tutelam ei præbuit: nam MANUIS soboles sua ipsius virtute defenditur.

5. Sapidos graminum manipulos ei offerens, fricans eam, asilos arcens, et viam quam ipsa elegerat non impediens: ita orbis terrarum rex vaccæ favorem sibi conciliare studebat.

6. Subsistens quando illa subsisteret, surgens illa procedente, illa considente ipse considerare statuens, aquam petens illa bibente: ita terræ dominus umbræ instar illam sequebatur.

7. Gestans ille dignitatem regiam, depositis etiam insignibus e singulari illius splendore colligendam, comparandus erat elephanto, qui intus furorem foveat, etsi non apparent liquoris lineæ.

8. Crines plantarum repentium cirris religatus, cum arcu tenso, erravit per sylvam, ac si, magistri sui vaccam sacram custodire simulans, immites sylvæ feras domare voluisset.

9. Ei, qui comites dimiserat, VARUNÆQUE similis erat, arbores ab utroque latere per voces avium lætitia exsultantium blanditias quasi acclamabant.